




心遠堂詩集



序

廷敬

嘗謂論詩不可以不大大於論詩者嚴於論真
偽而寬於論體裁或穠麗或淡泊或雄肆或婉約或
險怪或易直或其音中宮或其音中羽體裁之變種
種不一而莫不有真偽兩端吾辨其偽者存其真者
無非詩也三百篇詩之高曾也有風有雅有頌風又
有十五國雅又有大小頌又有周魯殷而一國之中
其音節又時有不同雅頌亦然使有妄人強爲判之
曰某詩也某非詩也有不粲然笑之者乎三百篇而

下爲漢魏爲六朝爲唐又爲初爲盛爲中晚爲宋爲元爲明其體之變尤不可勝數然有非詩者乎辟之山然或平而爲岬或峻而爲屨屨或狹而長爲墮或卑而大爲嶮或土戴石而爲咀或石戴土而爲崔嵬皆山也必曰某山也某非山也可乎辟之水然或澗澗或澎湃或石子可數或水一石泥數斗或一葦可航或非方舟不能濟皆水也必曰某水也某非水也可乎山不同同爲山水不同同爲水詩不同同爲詩同者何也真也真於詩者其學必博其思必深其詩

必能自立僞於詩者其學必不博其思必不深其詩必不能自立將附人而後立者也附人者常累人沾沾然誇於衆曰某之詩學於某者也豪俊之士欲抹其僞然而鼷鼠之微不足以辱干鈞之弩於是憚取前世所最知名之人爲衆所喜附者而過爲抹撥曰是亦有罪焉爾夫豪俊之興本以抹僞而其後又不免於僞爲首庸者卽爲罪魁前爲拱壁後爲敝帚甲方主之乙且奴之喜同而惡異相傾以成名風雅之場化爲罵座甚至化而爲門戶爲鉤黨皆有之矣

吁可畏哉

本朝定鼎三十年詩之道盛一時能詩者如林而卒未有能逾我

高陽先生者先生論詩王李七子鍾譚二子其辭皆予而所不予者惟在其效顰學步之流大哉言乎先生之詩不主一家而自成其爲大家其所論卽其所爲作之根柢也夫蓋先生之碩德豐功彌謨

廟堂不可殫書要皆本於性情而力於學問溢爲歌詩炳炳麟麟颺言之逸響也雅頌之嗣音也化工元氣

之無所不包而萬物生意之無所不具先生灑落自得之趣於此蓋可以想見而可以一家一體名之哉

廷敬

先生門下士也先生爲昌黎爲廬陵而廷敬不

能爲習之持正與子瞻兄弟於先生斯集行世不具論其詩而論其所爲詩之本非敢謂能知先生亦曰竊比古之學詩者爲小序爲傳爲箋而已矣或曰先生是刻詔曰心遠堂集集中有慕乎田園之樂者不一而足而風格高雅獨絕亦大類淵明世必有居廟堂若田園一切富貴聲名舉不足以累其心者而後

有真高人真詩人真宰相其言視廷敬所言爲進試
併質之先生

高都門人陳廷敬頓首謹誤

序

宮傅高陽先生於辛亥冬刻心遠堂詩若干卷行世

迄今丁巳更七年所詩益富

天馥

與同門友陳子

廷

敬毛子

際可

復謀彙梓旣獲請於是俛而讀仰而思

曰先生盛德大業見諸當時垂諸奕禩固無事藉詩
以傳而詩又若是其詣極也哉蓋詩之爲道必有所
由本焉必有所由兼焉其源遠流長之故與廣舉博
包之量竝遂夫窮高測厚探賸入微之致不於斯二
者求之不足以見先生之詩之大且備也今夫士畱

心聲韻之學伏處荒江老屋之下寂寞無爲鏤肝鉢
腎童而習之白首不得其要歸蘄與古作者攬袂拍
肩常寥寥不數見何也知爲詩而不知詩之根底猶
有在也臯夔周召未嘗學爲詩人天下後世亦斷不
敢以詩人目之乃明良喜起一歌先儒謂爲三百篇
之權輿學詩當於此始至關雎鵲巢卷阿天保諸章
則又駸駸乎極風雅之盛無他口之所言皆其躬之
所履洋洋灑灑無弗工無弗肖也先生論思啓沃歷
相兩朝

主聖臣賢相得益彰從容於黃扉綸閣而以緒餘播被
篇什用寫一時泰交之休風直臯夔周召等耳區區
詩人云乎哉此則先生詩所由本也間攷西漢若蕭
曹若丙魏號稱良相而醇謹樸遯文采鮮所表著司
馬枚臯之徒從遊太液載筆長楊彬彬文學而於政
事又鮮所設施有唐張曲江高達夫庶幾近之曲江
常憂讒畏事達夫晚遇類多堙鬱抑塞之感焉先生
德邵才優早歲擢巍科枋用顯行上揆曩喆豈可不
謂毫髮無遺憾者哉且卽專以詩論之其體格迥不

一轍矣李杜體有各到燕許郊島格有殊尙力之所
造性之所近烏容強先生海涵地負自郊廟朝會以
至遊覽贈荅晦明風景草木禽魚每有吟詠靡不錯
綜盡變亘細畢該譬嶽瀆出雲雨無窮也譬公輸營
衆宇咸當其制也譬大將將兵六花八門戈甲蔽野
進退指揮如意也此則先生詩所由兼也 天馥 蠡測
有年茫未窺其涯涘曷足序先生之詩在昔尼父筆
削春秋游夏逡巡莫贊惟刪詩則序而發明之今竊
附於卜子之義庶乎其有辭已

永城門人李天馥頓首謹識

序

古者三代盛時明良相遭治化大洽雅頌作於上而
天地之和應焉故明堂清廟之詩歌詠盛德大業於
以被金石諧宮商迄今考之大都君相之所作其洋
溢太和爲功於天地至大也自國風廣而雅頌微於
是詩不在上而在下學詩之士逸在布衣而悲憤放
曠之詞出矣夫生際昌時必不爲衰颯之調身居廊
廟豈復同鄉曲之音故世道盛而詩與俱盛者轉移
氣運權在上爾

國家右文之治垂三十年

世祖敦尚經術崇重儒臣

皇上繼之萬幾之暇時命左右臣僚講學賦詩一時公卿大夫振拔景運作者間出而

高陽先生歷事

兩朝潤色鴻業講幄談經則有詩丹扈規切則有詩扈從鑾輿則有詩以及歲時拜賜內廷侍宴靡不有詩海內之人想望風采以爲雅頌復作皆願得先生之詩讀之而以未得讀先生之全集如饑之待食渴之

求飲矣夫三代而下詩人至唐稱盛然孟襄陽杜少陵窮而工者也而不必以詩昌其身宋延清崔澄瀾達而工者也而不必以詩重其人上下三百年間惟魏鄭公張曲江裴晉公數君相業與詩名竝顯他如姚宋之功名特盛而不聞以四聲五字之學挂諸談藝者之口噫何其難也今先生事業彪炳足以垂休光照史冊而其所爲詩且能鼓吹休隆導揚美盛蓋以臯夔立唐虞之廷未有不能拜手而賡歌者也以周召際成康之會未有不能陳詩而作頌者也先生

當

聖天子右文之世出其生平所學致

主於堯舜躋俗於平康用是和其聲鳴國家之盛非僅如文士之所爲詩已也然先生之詩亦不盡應制紀頌之詩也今夫朝會饗宴之章與比物托興之什各工其製各盡其能合諸三百篇興賦比之體則無不同譬猶柏梁之臺建章之宮之巍且煥也楊子之亭葛氏之廬之宥而寂也其爲經營堂構則削墨引繩非有甚異以是知詩之爲道開合變化無所不至要

期合乎體之正而已苟合於體之正則千百世後之詩奚不可進而雅頌耶先生之詩凡托於風雲日月山川草木鳥獸以發胷中之奇者諸體不一乃其爲興爲賦爲比一唱三歎悉本中正和平之旨得其所以爲體故耳弘幸奉教先生之門因得請於先生而付之梓詩凡若干卷今而後海內想望風采者皆得讀先生之詩而知上有右文之

天子卽有鼓吹休隆揚導美盛之大臣三代以上之元音於茲復作也豈不休哉

康熙十年歲次辛亥日月既望梁溪周弘拜手謹識

序

高陽先生詩集若干卷當世仰望而恨不能盡見也

暇日偶以示

禾禾

請壽之梓不得已授焉且命贅言

於後因再拜卒業吟哦往復窮日夜之力不能窺見
萬一而惟覺意旨之淡訓辭之厚淳古大雅卓然一
代之元音也先生自翰林登政府佐

世祖皇帝致治太平其顯而可見者典章文物聲名度數
煌煌昭代之制作從容廟廊之上而天下安如泰山
功德在當世事業在史官先生且有而不居退然若

未足至於詩文之事固視爲文士之末務尤不欲以示世然自開國以來文明大啓至於今垂三十年朝野犁然嚮風原其始則自

世祖皇帝鼓舞興起於上而先生首被知遇凡國家大著作如典謨訓誥懸於日月之際至於應制詩賦流傳人間自是學者知所依歸而羣焉稽古迨於

皇上又以經術啓沃崇儒右文承學之臣彬彬盛美莫不以先生爲折衷此先生之文章爲氣運所關而開風會之始蓋自主臣同德棧樸作人而致今日之盛

非苟然也夫事功之與文學兩者恆不能兼或兼焉而未爲盡善往往相竝而論以蓋其短至於先生語事功不必有文學論文學不必有事功何其全德備美乎蓋先生所體者道而已道則無所不貫根本深而成就大時而措之裕如也古之大臣弼諧其君訓飭有位以及采風問俗導揚德化皆於詩乎發之先生之詩雖一詠一言無非忠君愛國之意蓋藹然雅頌之音和五聲平八風格神人來率舞將欲使在朝有鹿鳴天保君臣相敬愛之情草野有豸首騶虞小

民相揖讓之俗此固先生所以荅

兩朝之恩而慙慙欲致於斯世者夫先生於時可謂大
行其道矣而其言猶若不能盡適時有睠懷山林棲
遲丘壑之願此則非予小子所能知也所可知者先
生之道既已佐致治平而以餘事爲文章又專詣獨
至雍容大雅開本朝渾融磅礴之氣俾後學羣歸
而成太平之治象此卽

世祖知先生之淡而

皇上所以用先生者大豈風雲月露感物懷人之作可

同日而語哉禾於門牆爲下士安能仰贊高淡而先

生之立身行已爲中外矜式故其道德文學實可示
天下後世而無媿辭且幸附名末簡以傳於無窮也

謹序昔

康熙十年歲次辛亥十月望日江上受業曹禾百拜

識

序

六經皆聖人之教也詩之爲用若不及乎他經之重
而其教不可一日廢乎天下者其所重蓋有在也後
世士大夫於他經之用習其義而不敢自作獨於詩
則人人而作之其間所稱才豪傑起特以瑰麗宏灑
之思敷華爛然以相雄長然華落則根見如秋潦縮
而源泉竭也或則窅堅孤邈出乎矯揉以別俗而非
其中之誠然若是者以爲詩之容觀則善矣求其用
之不可廢乎天下而教所由以重者安在哉達賢者

之於詩則不以詩爲詩也以我之所本有者爲詩性
澹澹而凝情湛湛而至率所有而言之大者可以安
國家保邦民淡者足以鉤萬物隱會道德源散乎詠
懷託興之間而無不具其興起在上則有處富貴而
不淫極盛滿而不居之操得其君行其道而有天空
霞斂萬象不滓之度涉乎吟風詠月之下而無不形
是故可以移風尙感人心而裨世會詩教之所以爲
重而成其用者豈偶也哉珩自昔來長安見所流傳
高陽先生之詩讀之必斂容太息曰此詩之必於垂
教而不可一日廢其用於天下者乎久矣其不見於
近古也其後得從學先生左右始盡讀心遠堂詩集
於是伏而求之天下皆知先生之詩和平淡厚追雅
頌匹賡歌以爲先生早遇通顯輔相

兩朝身致太平之業其所見乎詩世隆而隆則然也不
知此得其象而未達其原者也先生之於詩所謂性
澹澹而凝情湛湛而至本其中之所有以爲詩而非
以詩爲詩若敷華而去根矯志而眩俗者也集所載
各體詩幾及千首大率述懷託興者什之四扈從輪

軒贈送詠物者什之六其間睠懷君親則其詩纏綿
激發而不自已使讀者瑟乎中情憾乎與思若刺痺
而起蹙然此本乎先生之忠孝性成不加意而自然
攄泄者也當其流覽行役感民氣之凋傷憂治亂之
遷化則其詩哀思悱惻反覆慤慤之下如欲寘諸膝
而納諸懷使讀者慨然欲任天下之重於其身及乎
濟人聖世輔治古隆則其詩疏怡休暢醲醇宜平使
讀者莫不厭足醴醪躁心和隘心融如熙春臺而獲
大田此本乎先生之一體萬物同天下之憂樂而無

我者也惟先生之所有於中者可以慊寤寐格金石
故垂其詩之用於天下可以感人心而移風尚以大
裨於世會知先生之詩則詩教之所以爲重居可知
矣雖然先生之詩更有進此者和平深厚其體也本
乎性情其義也抑峻潔淡遠而超悟則其品與詣也
由先生道心浩氣雖位極人臣功塞天地而其胸中
若浮雲之盪太虛無一毫足以與乎真我而飄然常
有煙霞丘壑之思故其爲詩雖富有百家牢籠萬象
而筆墨蹊徑之外恆超然獨契非情識可到遇之如

太華晴雲天風環珮可神解意悟而不僅求之於宮
商律度之際也歟小子珩不足以知先生之詩特識
其所見以俟讀先生詩者昔

康熙癸丑季秋朔旦浙西受業沈珩百拜謹識

序

歲丁巳

高陽先生心遠堂詩集告成伏讀旬日至於紙敝墨
渝手終不能釋也夫詩首三百有風有雅有頌爰以
示勸懲而興教化自學者不講於其義各就性情所
近以爲詩歷下空同有雅頌而無風公安竟陵有風
而無雅頌其體不備則義亦不全而效顰學步者無
論矣先生閒居之作感時思舊詠古懷人其詞疎通
而肆達近於風又嘗奉使吳越八閩間紀譎俗畏簡

書以及人民疾苦無不入告其詞深厚而愷摯近於雅至其侍宴

瀛臺扈蹕

清廟忠君愛國之忱發於楮墨其詞淵弘而廣博近於頌而精力所詣神明變化於其間彼以一體一義求先生者何足以盡先生哉然夢仁讀先生詩則又於編年紀月而見先生才大而心彌小業成而志愈篤也古人述作動以年紀杜少陵五言編於開元二十三年迄今攷之灼狀知其時地悉其行事因以想見

其爲人今世沈酣榮利之徒曠日廢時文采無所表見其類唐自放者又無意爲詩間有所作皆隨手散佚天下後世將何所藉以論定乎先生手加續輯自甲申以後爲卷十二各編以年後先增補悉附於每歲之末用以自考俾讀者知先生學與時進羣然有所觀感不徒以葩辭縟語爲得風雅頌之意已也或曰文學政事自昔難兼先生

兩朝元輔豐功偉績書竹帛而壽彝鼎似不必復以篇什見長夢仁竊謂不然昔韓魏公功在社稷詔誥則

資之歐陽以爲天下文章莫大乎是乃其安陽一集如布帛菽粟已足傳世而行後若歐陽好言政事而不言文章其意若以所不足者自勉而慶曆佐命之臣稱四傑者公居其一然則惟難兼者能兼之斯足尙爾於先生又何疑焉謹序

康熙丁巳菊月望日瀛州宮夢仁拜手謹識

序

太史公曰詩者發憤之所爲作也而歐陽子又曰詩窮然後工世俗遂據爲定論蓋士生斯世往往不得志於時幸而得志於時矣而身世之間稍有未遂卽怨懟隨之每著爲感慨抑鬱無聊以相夸尙而溫柔敦厚之旨於是乎寢失矣竊攷詩三百篇其出於怨夫遊女者無論卽小雅憂憫刺譏諸作自蘇公譚大夫以外多不傳其姓氏若周公之陳時邁召公之矢卷阿皆遭遇熙隆堂簾一德相與導揚國家休盛誦

之如瞻景星慶雲而聆咸池大夏之奏也豈非詩教之正始歟

高陽先生淵源家學弱冠讀書中祕已而啓沃綸扉二十餘年豐功厚績照耀竹帛更值

兩朝右文之盛退食之暇以詩教率先天下向有心遠堂刻海內人士無不口吟手披奉爲模楷歲丙辰諷咏所積紙墨逾多際可晉謁京邸時聆警咳始得盡讀之丁巳秋遂合刻於汴陽而先生傳命告誡謂梓成藏之家塾不欲廣爲宣布以滋詢議嗟乎其望

日隆而心日下耶竊讀先生詩富有日新包羅萬象自朝會扈從以暨感遇摠懷贈遠詠物不各一體而忠愛之意纏緜悱惻皆於言外遇之因思古人所爲一飯不忘君父者亦當求之於神明氣象之間而箋釋諸家輒欲句櫛字比窒礙難通此不足以讀古人之詩又何足以讀先生之詩哉顧先生以心遠名集而又多擬陶之製若以爲富貴非吾願者豈亦求工於世俗之論歟際可又以爲不然大抵達人君子處困而不以貧約爲憂者處亨而不以華靡爲樂卽如

靖節遭時多故簞瓢屢空南山東籬之下澹然若有以自適則知先生身都通顯而變理憂勤朝乾夕惕慕田園之樂而不得遂者固其所也昔子瞻作忠獻醉白堂記以爲公旣無愧於伊周矣而猶若有羨於樂天可謂先後同揆也

際可

管蠡之見不能窺先生

詩之萬一謹誌簡末以告世俗之互相夸尙者毋曰

時邁卷阿之後罕嗣音也

昔

康熙丁巳季秋朔旦遂安受業毛際可百拜謹識

心遠堂詩集總目

卷之一

五言古詩一百三首

卷之二

五言古詩九十四首

卷之三

七言古詩二十三首

卷之四

樂府雜言三十首

卷之五

五言律一百一十七首

卷之六

五言律八十七首

卷之七

五言律一百一十二首

卷之八

七言律一百二十二首

卷之九

七言律九十五首

卷之十

七言律八十一首

卷之十一

五言排律十七首

七言排律二首

卷之十二

五言絕句十七首

七言絕句一百四十九首

附

詩餘一十三闕

心遠堂詩集卷之一

高陽李 蔚臺書著

遂安毛際可會侯訂

鍾山王才鼎調臣叅

李其凝孟績

男

李其恕仲如

輯

五言古

郊居卽事

乙酉

中夏暑猶薄晨光引遐矚夜雨濕邨煙四野皆新浴萬

樹靜微風平疇凝一綠遙田當我樓可以時寄目鷄豚
識原塋煙火辨茅屋策杖羨老農蚤起察種稂悠哉天
地意萬化於此足

秋日

朝出城南門秋氣相侵凌郊原一蕭條百草愁不勝豈
無時序悲所慰禾黍登微生固有分其敢忘夙興

賦得秋菊有佳色

三首
丙戌

微風帶霜氣着我庭樹枝如何桃與李坐失三春姿
焉東籬下寒華自歲蕤棲息忘物我歲暮同襟期采采

寘懷裒道遠何由知

其二

秋菊有佳色灼灼君子庭豈曰耳目玩共勗雲山情勁
風走落葉百卉何淒清咄此不足悲昨夜鷓鴣鳴趨蹌
長安塵媿我多浮名日落幽窻下魂魄聊依并

其三

日夕坐前軒陶然醉孤興有酒時自斟愜此黃花徑忽
聞歸鴻鳴四野秋聲應感之罷壺觴寂寂青燈暝

秋感雜述

十二首
戊子

西風何方來一夕改庭柳代謝旣倉卒炎炎詎堪久大火拂雲漢商吹生林藪寄言桃與李芳華非君有

其二

斜陽正鳴蟬低徊去霞影耳目遂淒迫孤緒如有傲遠礎滋舊憶泫露有餘靜恭惟古喆人此生以爲甯嘗恐日淪棄矜踣失所乘買山笑豈免臨淵羨徒耿

其三

四氣遞生殺所任暑與寒隕霜死百草曾不遺蕙蘭大運一以傾愚哲寧殊觀身世兩相委落葉隨驚湍下土

逐憂樂戚戚不自安胡不探物化榮悴固有端

其四

銜悲倦危坐步眺出郭門所悲諒何爲節候臨中元時俗展哀慕傾城事丘墦富者刲羊豕貧者羅盤飧親疎雜歌哭兒女相慰存西風暮淒緊紙灰高飛翻喪亂近廿載干戈殫乾坤郊野足白骨爍燹生雕垣觸目但蒿藜狐狸啼空邨鬼聲沸昏夜半爲兵死魂號號敢爲厲尙痛其子孫皇天未厭禍四海仍崩犇念我先塋兆遠隔三寒暄僅能免樵牧誰爲治醕膳棲棲走微祿塵網

阻歸轅惻怛履霜露生我豈無恩

其五

啁噍夸毗子磬折事要津一笑或相假不惜辱其身
酸冷利亦去禍釁發所親今日操戈者昔日彈鋏人
閉門謝結納白首幸如新

其六

鷄鷓止魯門神悸饗鐘鼓於越文身邦舉俗笑章甫
物情安所習驚衆乃招侮從來達識者和光在塵土

其七

中庭雙紫薇光蕤夏及秋誰使花不實歲晚成沈憂
結條未堪贈委砌無人收美人感幽獨坐對西風愁
我生同物化芳妍詎相借况復白露時單衾怨遙夜

其八

苦竹亦有節寒菊亦有芳哀此簷際花蕭滅萎嚴霜
物性異貞脆順受固其常奈何末世士局促失行藏

其九

鷺鳩時鼓翼捨榆未能勝栩栩有其樂不羨南飛鵬
一枝已云足六翮敢自矜卑栖得所性豈惟逃网罟

其十

驅馬故城下烏鳶翔空壕敗屋絕煙火蓬艾如牆高黃
塵埋斷碣遺名認賢豪嗟彼中澤鴻啼饑聲嗷嗷徒知
振長策計晚思補牢

其十一

壤垣乃揖盜智子疑其鄰言同異功罪豈不以疎親坐
咸杳已遠獬豸當九閭咄咄草萊士所志何由申

其十二

繁霜鋼地脈凝陰陽氣窮落葉積庭廡枯條鳴北風田
家斂農器羣務皆休工悄悄念終古有愁無由通餽醕
以諧世崎嶇違淡衷

立春日雪

庭樹啼早烏虛窻夜疑旭敝裘不堪擁稜稜起寒粟時
當歲星改日馭旋東陸田家春節候陰晴職豐縮兵氣
微驕陽天心失寒燠兒童傲冰霰趨走輕顛覆科頭坐
清曉炊煙靜茆屋

寄懷紫淵

巳丑

昔者喪亂初生民付刀弩上國封豕張白日狂魑舞鄙

夫方多思抑揄坐相侮論交半狙詐齷齪不足數孫郎
好彘第肝腸歷可睹束髮事鉛槧俠名噪寰宇相遭述
世惠源自先父祖落落杯酒間身世悉覩縷媿予走微
祿局踳墜塵罟書來不諳讓知我憂貧窶新詩寄又多
詞清意淡苦愀然問天帝豁爾發聾瞽鷓鴣羞被嚇赤
霄刷毛羽誰植金琅玕縱遊過懸圃以子貢明廷四方
息噢咻笙鏞諧大樂圖書盛文黼卽今陽和轉天心照
林莽百草以時坼懷抱豈終阻徒望雲外山復憶耕前
雨何由倒樽罍相攜醉花塢

春日遣興

三首

滾滾長安塵驥驥策高足仕宦無中人壯夫亦空腹聲
利易結交朝昏自相逐裘馬照中衢觀者皆側目別有
執戟郎閉閣窮倚伏

其二

冰雪氣漸遠頗覺天宇和西望斂朝煙峰影晴翠多社
燕葺故壘庭樹振柔柯羣動紛自適我寧憂虞羅白眼
向今古浩浩一長歌

其三

淵明無酒資勉爲州郡仕束帶見督郵豈復能堪此解
組不終日大笑歸鄉里有田盡種秫自釀幸多旨三覆
五柳文千年照清泚頗怪杜陵翁枯槁何輕訾

哭殤女

萬物具形氣脩短雖殊倫時至會有盡奄歛隨飛塵去
冬舉次女出腹卽見珍睂目姣如畫溫細肌理勻襁褓
娛朝夕軒渠特可人柔條欲萌達霜期忽已臻爾母五
閱月提攜未離身食息節寒燠撫摩候喜嗔胡爲去閨
房棄寘歸幽窀粃糗爲爾資樽櫝爲爾茵穴狐爲爾僮
荒阜爲爾鄰我哭爾何知精爽思已溼雪涕斂遺玩腸
絕如含辛念爾未生時於何辨疎親天性旣相屬曠達
恐未眞我躬苟無缺皇穹豈匪仁忍讀太冲詩銜悲問
陽春

感舊

嬾拙久自放僻居絕人事蹉跎黑髮年牢落萬古思朝
來雲物清朱炎幸未熾綵縷與青蒲渾俗復何意在昔
當晏安令節歡娛備天壇競走馬夾道羅百戲別有豪
貴筵揮金鬪妖靡頻愁玉斝淡頗厭雕俎臙喪亂逐煙

滅往蹟各凋瘁回首歌呼場什伯無一二物理有終極
醞釀識所自當時厝火徒誰建徒薪議戰鬥飛暗塵飄
蕩披殘淚豎儒將安歸雙眼向旌幟

孫孺人節烈

陽九歲涸灘支祈沸坤軸天紐紛不張猘噬迷川陸難
作一夫橫事去百靈哭屈膝多公卿貫死餘骸鯨咄咄
閨中質忼慨氣無縮寸心乃霜明大節亦嶽矗嚼然蘭
雪姿千春挹清馥恤緯誠何心聊用媿食祿

酷暑

酷暑絕經過長晝獨閉門炎飈時颯颯吹我几席溫日
車停中天萬物同烝燔飛鳥焦其羽池流爲之翻畏景
苦難暮欲寐氣鬱啓已憎團扇重頗覺纖絺煩傷彼道
傍子簇聚如雲屯揮汗事畚鍤萬指相攀援觸熱豈不
憚巖筆莫可奔一身饑且暍舉室悲游魂使民有恒期
師行避煇燉茲役矧可緩胡令多銜冤浮埃蔽上蒼雲
雷久無恩安得生羽翼憤激爲叩闈我居幸閒逸湫溽
何足論

積雨秋夜讀書有懷田里

幾日碧蘚合客庭閒且肅濕雲低護簷飛雨涼濺燭永
夕幸無營開卷破幽獨息念攻羣疑觀生驗早服四年
隔鄉園五畝荒穉種今秋霖潦過奔流潄平陸漁舟載
戈鋌焚殺及茅屋况復煩捷伐無地安樵牧遺壘烏鳶
肥空村狐狸哭理亂如相周天心豈難卜

詠史

紛紛七雄時宗周若旒綴世主醉富強人心死功利禮
賢徒虛名賤土工游說從成則楚王衡成則秦帝山東
實脣齒傾詐爭自弊相割委強秦弱肉恣狼噬吾愛張
孟談曲折存趙計吾愛魯仲連卓犖挫秦勢排難辭成
功羞爲浮榮繫長嘯懷若人千秋氣凌厲季子多黃金
徒傷身後裂

漫興

露結庭始寒木葉稍欲脫夜長秋分後待旦渺難達
欬枕聞嚴更栖鴉冷相聒枯蕉集微雨蕭森涼氣闢勞生
竟何成歎息時已未諒無羽翼期瑤華安可掇懷哉滄
洲人晤語庶當豁

九日登歸義寺閣

日月協陽數嘉名昔共珍客懷非一感
睠焉追同人野逕入幽寺地偏趣易伸
高閣豁遠目物態一何新風日午方暖
雲水秋逾真澹蕩衆山色蒼莽九衢塵
爲歡幸簡率盛氣無逡巡誰能愛清醒
坐負百憂身

初冬 二首

招搖適臨亥凝陰稍已勁墻戶當前期
蓄旨代爲政屋霜曉來白籬菊枯餘靚
生意在嚴殺百族終於正理亂或如此
浩焉觀大命

其二

候肅羣木落濃霜封其條北風時撼之
中夜鳴波濤感此不成寐啓戶披縕袍
缺月在屋脊兀兀明星高鄰鷄警初寒
未曙已三號咄爾乃何知頗似吾生勞
廻合四氣中寒暑安可逃

贈易隱劉君

名養貞蜀人

百川潰四極白龍預且困運窮天地閉
君子亦肥遯饑鳴饜腥穢昂首嚇鷓鴣
雜時命苟不會紆鬱摧良圖夫子康濟
姿早具出世骨才湧錦江流神鑒峨眉
峯月竭來長安市垂簾論幽精委心任
元化埋照窺虛盈胡盧眼中

人塞耳蒼蠅聲舉世莫能識浪呼嚴君平君髮已種種
君心乃浩浩勿學魯連子東海未可蹈

哭濟寧李逸羣先生

庚寅

乙酉秋八月邑里初罷兵賤子苦謀食挾策遊上京是
時喪亂餘百務皆廢傾矧此鉛槧業迂僻遠人情多士
稍稍集黽勉入貢場山東李夫子分校司文衡榜發乃
叨薦果出其門牆爰從同門後始得覩儀光公德如海
嶽勺躋莫可量鄙野乃驟變薰陶賴包蒙及予告歸時
拜別招提中公意甚珍惜道義重勉襄出門當仲冬北

風慘衣裳計予方抵里公亦授巖疆迨乎丙戌春予獲
售南宮書札寄自淮愉悅盛期望清河古泗地疲劇當
河衝公才有餘刃擘劃無不臧左右簿領間砥淬道彌
精亥子冬春交臺諫需才良 當宁軫守令銓府奏公
名應召始北轅清民涕浪浪由是躋兵垣是冬 郊禮
成解澤沛宇內畿南命公行捧 綸不崇朝德音備宣
揚明年四月半竣職報大廷馳驅察道途凋瘵憫遺阯
賦繁有司暗論列首其鄉奏入得 俞旨切責期均平
未幾公移居予舍共一坊相去僅數武時時得過從公

最慎交遊予至則命觴嘯咏必終日名理同品評暑雨
破岑寂閒堦愛幽涼頗嗜熊鳥術吐納神康強七月感
脾疾予爲薦醫生公疾屢小愈人事復見妨執掌不可
辭漫淫再羸疋靜攝益謝客予獨造寢牀公無婢御侍
藥餌惟予商歲朝喜和霽起步坐前廊神貌愈清炯謂
可復健王首春過人日候疾達公房欣然語之坐茗酒
勸予嘗肢體雖委頓議論更肫詳劇談迄日夕惜別情
慚傷豈料遂永訣轉瞬殊哀榮易第當上元奔胝已殂
升未及聽遺訓擗捨莫自通一子哭躑躅二僕走熒熒
旅邸無長物周身具蒼黃故鄉千里外痛惻感路傍矧
於及門士能無摧肺腸公性異流俗各行夙端方土苴
祿與位恬處無競容出口絕臧否物我已兩忘大道腹
羣倫達識齊彭殤所抱未竟施不慙悲彼蒼丹旄出郭
門返魄濟北坐哀哉申此詞引領雲茫茫

夏至

茲晨斗指午日馭窮北垓陽極陰事起火王金已胎炎
涼迭爲用曾弗疲往來永驗晝景盡長知宵漏回去冬
苦無雪春夏稀雲雷麥秕禾亦焦颺風乘爲災連朝反

蕭爽涼颼溽蒸開是日行秋令萬族垂傾培盜賊况未
已田疇但荒萊憂生匪余力鹿鹿隨年催

久旱快雨竟日

伏後數日風秋行百物瘁昨夜猶繁星茲雨出不意土
潤適宜時况爲滌炎熾早赧映窻紅俗諺乃足誌翻盆
聲砰洶决渠力犇恣百川會神靈九陌怯塗墜驕陽歷
三時疵沴蒙動植霑灑雖時有滋渥今方被一洗瘡痍
蘇晚收田畝利草竊得銷兵災俱偃避共覩熙穰時
重乾子遺淚區區持斯願天心或不棄

秋齋五咏

齋植雜卉迄秋榮瘁不一杜門多暇擇其可以
寄興者五各系四韻時或展諷以醒倦臥非曰
觀物有得也

竹

去年僦竹居今年抽新筍脩脩數十竿青翠自相引對
之終日間頗使幽興盡無爲愁西風不隨秋霜賈

蕉

芭蕉陰乃滋得雨時已晏夏風息侵凌晚色稍蔥蒨綠

衣彼姝子長袖如舞扇卷舒得其宜終始庶相眷

槿

種松材難成種槿花易鮮朝榮暮已落盛衰如眼前物
理固不一脩短同所天汨汨世故中愛憎誰使然

榴

盆榴植數年紅芳一何茂纍纍懸枝實獨耀秋霜後惜
哉阻遐遠不得榮俎豆馨香不常好臨風爲三嗅

蒨

馬蓼本微物移根幽人側剪拂日以長照灼弄顏色非

供耳目玩尙有江湖憶安得返故藂悒悒秋氣逼

秋日寓感

八首

歷歷法景而勿勿芳歲搖客心久濩落秋氣仍蕭條在
戶有蟋蟀抱葉無鳴蜩斜日明空林商聲隨驚飈陰陽
默嬗代巧智日益雕衰榮轉相伺如彼莫與朝有形無
不盡金石溘焉銷寄言南山松無爲侘後凋

其二

候迫無淹晷秋陰易爲莫閒堂向夕開清燈耿幽素夜
久羣籟息征鴻數聲度感此不成寐孑孑中庭步仰眠

流雲繅菴藹寒月露河漢西南橫衆星爛以錯已矣何
憂虞闕哉此天路

其三

泄川無停流波波豈相及浮生态多營念念豈堪執伊
余本虛靜逐物膠所習形神迭成蠱欲械森觶觶四序
不相捨倚伏在歛歛側耳鄰家子朝歌莫聞泣

其四

朝入銅龍門長松肅晴昊夕遊玉竦橋枯荷照停潦窈
窈行殿閉女牆半傾倒何來牛馬跡狼藉滿馳道悼彼
經始艱綢繆苦不早玉者雖猶玉土崩何可保俛仰思
前轍興替殊草草歎陀何損益沈憂在微抱

其五

巖廊競仁義市賈殉刀錐俱爲有生累云何區高卑我
貴君形者水火無所虧大運驟回合朝茵安得知

其六

珥筆承明廬言動職所殫世更典故佚棄寘成枝官趨
蹒塵土中羸馬徒盤跚祿入雖不厚撫躬媿伐檀爲政
戒荒飽詩人譏素餐有懷不得展已復迫歲寒

其七

余本躬耕士早耽田晦樂霜期滌場後百穀亦已穫歲
莫羣役休鷄犬偃林薄鄰里時招邀濁酒共斟酌世事
若反掌人境兩零落昔歡百無一長懷負夙諾武備正
未弛誰能念藜藿還瞻故里墟寒莽宿饑雀

其八

秋至寒夜遙幽人起清旦高樹霜始凝顧瞻時物晏科
頭獨隱几嗒焉形神判何用抒遐衷遺編幸堪玩楚國
有貞夫懷忠而被竄其意乃摧愴其詞胡衍曼蒼葦盈
王庭荃萑擯荒岸諒無涸泥行安免懷沙歎豺虎却譖
人蛾睂如華髮突梯膏寵利好修蒙世難古今諒同軌
達士安足惋披讀若有觸沈吟及日旰

初發都門

以下辛卯使閩作

六年束吏舍所向困局迫出郊茲晨始豁若樊籠釋望
山懷故栖遵途惑新陌回首魏闕高塵沙黯將夕微軀
墮世罟拮据事行役豈無四方志悲與親愛隔曠寂均
苦樂浮生安所擇起滅情無端沈思莫能擲

便道過里

匆匆車馬至蓬戶散雀羅開扉掃塵榻陰森氣未和遺
友三五人攜酒相經過道昔如失夢問名幸無譌意色
共潛悒慰藉翻滂沱慚其斟酌厚微酣成悲歌悲歌何
所云人少豺虎多

登真定大悲閣

昔聞大佛名今登大悲閣于役首茲遊探奇况夙約投
禮意恂怙仰瞻目驚矍逆想結構初神鬼效丹雘峨峨
七丈軀寶鬘雜瓔珞端慈乃天成模冶豈智鑿諦觀千
手眼微妙竟何着愍愍曠劫心羣愚固自若旁矚磴道

幽高躋足力弱三折始造顛豁然入寥廓雲霞隨呼吸
日月可捫摸鱗次迷街衢螳垤擬城郭山氣蔽趙魏晨
光眩怛鄙滹沱帶長流遙聲散歎歎薄遠媿翔雲鶴俯羨
蟠泥蠖身世跡蒼茫旅見罔依泊刼者何檀施傳自有
唐作草草宋元明閱歷事如昨卽今喪亂餘棟宇頗摧
落願聞無上義大千醒沈瘳

渡河

洪流浩元氣蘊蒸幾千古天地遠莫分蛟鼉細難數頽
洞望龍門胼胝想神禹欲爲窮源行靈怪或可睹

大梁懷古

渡河三十里磽塉沙莽屯返照翳餘曠荒城出高原云
是宋都會迄明爲雄藩驅車試周覽惻惻難具論我聞
昔全盛宮觀如綺繁百年幾翻覆遺構仍間存雕牆賸
丹雘慘淡顏色昏草阜金明池崩岸玉津園黃巾擾明
季斯邦未易吞墨守力已竭歷年絕外援盜怒遷於水
洪流入崇垣貴賤百萬姓爲魚死何冤卽今地形厚歷
歷淤漲痕寂寞尋吹臺突兀問彝門詎辨審音處何知
俠士魂天道固如此已矣復何言

泊江口風雨

十日滯維揚再宿淹瓜步艤櫂大江口浩蕩生愛懼崩
沙沸白波遙山羃黑霧洶轟雷車奔瀕洞雨師怒煙昏
潤州城黛沐金山樹魚龍紛騰拏晦明變指顧頗使羈
愁恣欣與奇境遇所慚當長風洪流未能泝

望惠山

弱懷結奇尙遠遊欣必遂當境何多乖投緣似相避惠
山挺吳壩一水入遙眠佳泉耀茶經夙聞已神醉陂陀
間高下林壑布森邃少斂雨餘雲微辨煙中寺騷騷南

風逆澹澹西日墜
暝色野蒼茫
遠失諸峰翠
征颿束巖程
愈信簪組累
遐期汎秋濤
庶滌山靈志

胡予袞借汎西湖

良朋佳山水
際之號奇遇
尤奇旅役同
而盡天涯趣
聯輿出城闈
環峰眩初顧
舟楫味久諳
壺觴煩夙具
澹瀕風不停
激泓石可數
凜凜清我襟
初夏失蒸响
篙工逆施勇
風顛白浪怒
雲波恍惚中
如有靈怪聚
四山鑿碧匪萬頃
青鏡布明晦
一以殊形譬
詎能措竹覆
六一泉鶴去林
公墓肅哉
千古人胡爲
歌酒污溪探
乏濟勝非

獨豺虎懼杳杳長葑青
踟躕斷橋路

發江山

行役未云已
所見日以殊
受分有勞逸
安能厭馳驅
太末控須江
南北實要途
邑里一何倣
田瘠物色枯
自昔遘喪亂
鋒鏑氣未蘇
及今歲方饑
斗粟易琲珠
悍壯揭竿去
穉弱爲流逋
羣盜隱巖砦
出沒如豺貙
行侶飽凶噤
會無間斯須
守土急搜勦
滋蔓胡易圖
兼聞虎爲虺
白日游通衢
磨牙恣吞噬
豈直矜負隅
迢迢四千里
艱阻首茲區
知命復何憇
憫俗翻長吁
遙市輳商舶
有里

日清湖解鞍試休沐昂首畏景晡

經江郎山次峽口

出郭路漸南目極萬山蔽陂陁互高下與行踐田畷江
郎何由名三峰聳雲際或云慕仙者江氏三昆弟飛舉
道未成化石迷年歲未遑究誕渺徒能仰幽麗一峰形
敦龐二峰比而銳林立肩相隨隱見蒼煙衛行賈必過
瞻豐縮卜明翳又云巔有池雲波汜溶瀟金鯽多奇鱗
碧蓮非塵帶可望不可探俗鞅何由稅

僊霞嶺

雨破炎風涼吹我僊霞嶺途改旅思新力盡崖路永迴
合目易眩盤陡步無整衣穿白霧濕肌濺懸流冷低眠
飛鳥背仰接奔龍影挂樹猿狖閒蹲石虎豹猛天近雲
車翻嵐沐煙鬟靚蒼黑杉百丈蔥蒨竹千頃唯昔此設
險巖關隘要境事去衆志非金湯費藩屏盜賊尙藜嘯
嶮隘尤多梗世人競捷足及茲未易騁

楓嶺

楓嶺與梨嶺南北相拱揖石脈固潛通蟠峙各獨立林
木互糾紛亂峰森鱗鱗其巔判閩浙風土隔邦邑躋崖

俯絕谷轉道僅微級凌空危橋滑束礮鳴溜急負擔盡
游估攀緣如蟻集傷哉營微利走險詎夙習下見稻畦
人驚客舉蓑笠馳驚違所性邇迴增憂悒

梨嶺

梨嶺曰五顯以其神最靈廟貌踞幽麓旌幢幻竊冥祈
請走途旅輸誠卜茅筵厥職在彰瘡豈惟酒食馨我行
蹇留憩晦雨曾無停石磴仰逼仄崖谷深蒼青辭家百
晨暮俶詭多所經浩焉窺大化物我俱未寧

舟發浦城

地形下東南灘溜如矢疾客行衝霧雨扁舟僅容膝鄰
鄰沙痕高齒齒石鋒密礪礪中流鉅細狀非一狹逼
驚濤飛湍沸漩渦溢舟楫巧紆避簸盪神先怵篙工一
失手勢爭洪波汨菀蒼崖卉稠奔激岸峰峯駭奇豫初
覽煩促厭縷述乘流怪浮生坎止私願畢

建安道雨

雲晦飛鳥藏行子不得息輿棧渺無定川陸屢回惑南
土苦卑濕夏溽雨蒸塞淫霖迷昏曉險滑困緣陟長河
漲白霧遙山皓同色祇疑天潢傾神龍怒叵測飛沫濡

須髯顛躓步匍匐徒裝沒新潦
芑屢委塗埴微躬匪金石而爲陰陽蝕
已往慚知非迷復將何極

鐵嶺

歷嶺什伯數茲山名獨著
縣巨界鐔汀敦龐勢堪據
蒼涼萬喬木浙浙野風助衆葉
一以秋燠促獲偃豫四眺
天額改雲石互騫翥森然靈怪窟
誰能指其處巖砦賸伏莽扞衛累徒御
畏途不可畱惴惴驅車去

往復過將樂以不得遊玉華洞爲恨

伊余滯京師每作雲林想薄秩苦維繫
不得遂長往及

茲遠行役萬里環輪鞅雖倦馳驅勞
謂伸夙昔仰鏞州富岳窟玉華號幽廣
宵冥鍾瑰異蒸瀝幻物象昔過嚴程迫
今歸淫潦長逢人詢髣髴驚暗徒懔惘
神境隔塵俗劣賦慳靈賞乃徵造物緣
離合莫能強

黯澹灘

谿灘奇多名黯澹不可觸我來值水殺
洪流尙奔續巉巉萬石齒𦍇布無遺矚
直下礮勢阻逆陟峽形轟當其汜濫時
拍天激浪酷行子推畏途咫尺鄰魚腹
岌岌牽一怒禍劇垂堂蹙長年氣整暇
棊柅理詳熟仰瀕凌飛

濤石罅妙紆曲進止有餘裕操持快心目因知濟險者
所負必素足庸夫喜大言遇變手恒束

浦城旅舍早秋效長慶體

涓涓池面荷澹澹荷下水寂寂虛廊靜獵獵微風起魚
影近依依竹光青靡靡森爽涼肌骨徘徊閒杖履新秋
迎可親殘暑去如委勿爲羈旅嗟幽居胡得此

釣臺

峽關駛清江林秋煙漠漠歸樵愜沿流晡發富春郭曉
及巖公灘宿雨生朝寒濃霧蔽不盡雙臺出巘岿停榜

蹇維繫杖策躡石級孤徑人踪微草露霑衣濕澗藻綠
堪把再拜公祠下漶漫何年碑尙記持竿者昂首磴道
危引臂蒼蘿垂三休猶未極發興能忘疲盤迴過木杪
松栝隱遐眺浙浙羣籟吹絕壑開森窈天成峙左右石
亭亦相偶一瞰碧茫茫先生竟何有試覓垂綸處竚延
不能去蕭然榛莽間沈沈增慨慮嗚噓交道凌意氣多
驕矜世無劉文叔焉辨嚴子陵

金山

徧歷山行艱見山不敢厭孳孳嗜奇志時苦力不瞻覲

面多所失事後徒縈念以斯自懲艾決策期莫玷茲山
當舟達終古峙奇豔壯遊夢寐中披圖未能驗孤根輔
地軸傑構蹴天塹招提隱雄麗神怪此壇坫日受洪波
攻斂竇開灑激石林蕩紫翠雲波互烘染我愛浮圖高
一豁天顏挾諸峰戴亭榭瑣屑氣盡斂朝探及畢景恣
畱遂忘饜覩縷將有述何以使無歎

高郵湖

偶爲乘風行清曉帆力足輕陰遲晨光煙姿澹相屬扣
柁溯邗流去鳥翼同速指顧度孟城一葉入激綠平湖
始何代龐爲衆壑腹空明勢無極一一細紋蹙雨色東
南來波靄共犇逐遠近水態更葑蓼靚膏沐茅茨瀕湖
氓婦子臥溝瀆媿余力匪及徒取媚旅矚

黃河舟行

數日雲物善九月亦未寒空明大河水南風吹驚瀾川
圻邈紆夔天地茫無端洪流委身命瓌詭愜大觀遙思
下積石濫觴初瀾漫偉矣參四瀆終古神獨完濁浪勞
晝夜利涉人力殫飛檣距奔漕探標試洄灘快余乘長
風危檣無所難蕭灑林外邨鞞鞞耳底湍高秋氣森爽

草木淨岡巒夕照頽中流動盪赤玉盤誰云茲艱虞披
眺得清歡忠信敢自矜履險實所安

歸述 二首

昔去西城西今歸北郭北往復此故吾風塵改顏色長
安名祿區巧僞日滋殖熙熙爲利來馳走幾時息朱門
非舊王窮巷多新識世變若流水東逝安所極

其二

昊天闢嘉運羣龍翼休期薄才事奔走如彼蟻旋規伏
觀古王治綱舉目畢施管氏伯者佐亦云張四維宣室

倘有問芻蕘敢言私

夏夜對月柬胡予袞 壬辰

永晝漸難夕炎氛幸未盈四體遂休暇蕭然此閒庭月
出東南天鑿人有餘清的爍移屋角空闊滿前楹河漢
沒無見衆曜失光晶高林葉茂密晰晰棲鳥驚翻如淡
秋夜羣吹成淒聲乃知悲喜端外物撓其情舉似誰足
語浩歌念友生

建蘭數本攜來自閩南北失宜半就枯瘁夏霖滋
殖雜草實繁幽靜之姿遂見揜沒傷嘉卉之不

勝惡植也爰爲賦詩

憶汎建溪舟閩土多芳草幽蘭軼羣類芬香昔所寶提
攜逾霞嶺遠來萬里道屈爲牖下娛慰我丘中抱何期
生意盡莖蒂日就稿或有殊鄉悲炎朔候顛倒乃知絕
俗姿違性難爲好今夏雨不休庭際成潢潦衆草滋爾
藜蘭也蔽莫考蒼蒼方怒生紛披勢堪惱嗟乎陰陽權
詎惟凶是保雨露無岐施美惡迷大造安此非一朝搔
首仰長昊

贈別二首

莽莽京洛塵端居淹歲暮何來剝啄客投我以尺素駕
言思故山拂衣卽長路高唱河梁詞三歎爲我顧欽子
淮海俊中懷璠與璐惜此清廟珍煙霞豈能錮大運方
亨衢羣龍正翔步胡不彫華纓裒衷策高足握手永今
夕白駒幸可駐勉矣崇令儀庶用慰愁慕

其二

離驂嚴晨駕之子不可畱采采文無贈微言默相訓何
以展衷款清涕霑君裘明月爲君佩杜蘅爲君羞敝倪
六合間聚散如浮漚自匪連理枝乖絕當何尤東南渺

雲外山川阻以脩勿輕斗酒會臨觴
蠶網繆北風吹五兩孤棧沿寒流
瑤草芳未歇歸與僱佗謀

雪

夜漏凍無聲虛窻闇生白曉看枯樹垂
饑鳥啼喑喑低雲無異姿廣宇皓同跡
澹曠激幽襟凝互絕來屐三白兆歲豐
臘雪等珠璧陰陽銷僂厲東作富菽麥
皇天意良厚曾無吝膏澤吾廬雖敝陋
忍寒詎足惜

苦雨

癸巳

逾月雨無間
沄雲黥不開
朱火失其柄
陰沴乘爲裁
慄

戾長風鳴鞞鞞中宵雷黑蜃肆跳跟
神龍怒喧虺力挽天河傾萬弩不可迴
昏曉一晦昧霑濡靡眈眈百川隄障盡
三辰晶彩頽几席羃碧蘚篋笥黧蒸徽
虎踰緣衣桁鼃黽游庭陔敝室更苦漏垣
宇半崩摧曳尾本泥滓藏身唯蒿萊固窮
聊自矢已溺徒興哀

願養篇送

少司馬玉調先生致政歸里

周文衍羲畫雷山命曰願雷入山以息斂
動而靜治至人求口實養正盡于斯
聖主眷老臣乃以此錫之許謨豈不惜
高蹈胡可縻天意盡終始使事道無遺
唯公

承 帝命雙駿結文驪輕裝不盈肩巾車圖史隨公卿
出青門祖帳羅通達路人相歎羨有如二疏時公歸及
里門下車行逶迤故廬開北牖新園闢西池種秫足甕
釀蒔竹遮簷茨朝登金門山吐納雲物奇夕弄元漚水
溯洄舟棹遲把臂五老會公家永寧先是有五老結會
公至是復約同志爲後五老
會 快意滄洲期康濟付兒輩林巒續親知俯眎世間人
膠撓如虬蚺憂國惜公去愛公贊公宐他日戴崇至清
尊許共持

送宋玉叔之秦州

駿馬鐵連錢嚙掣黃金轡借問行者誰持節神仙吏子
本金閨彥青雲早自致論交盡天下蘭雪照明義泱泱
表東海卓樹辭壇幟剖疑訂今古風雅資鼓吹余也識
君晚半面心已醉平居疎經過欲別始煩恚側聞天廟
需首重瑚璉器胡爲去遐陬不及陶匏類滂蕩雲衢高
翔遊必孔翠環瀛恣所如刷羽非垂翅 天子稱曰能
巖疆惟爾試一路蘇民疲五涼控地利是時北風勁燕
臺草木瘁握手青門旁含語不得遂巒嶂擁關山西望
雲沙積羌兒竹馬歌隴管梅花淚爲尋東柯好竝探仇

池邃應續杜陵詩晨風待遙寄

耜田恭紀

甲午

順治十一年仲春肇舉耕耜之禮爵叨侍從獲

睹 盛典爰賦詩十章俾夫擊壤者謳焉

昊天擇厥子惟德不以親聖人執犬象奠物非佚身禋
享有常秩幽以悅百神阜求不敢私明以媚兆人人神
苟無憾黃虞道彌淳

其二

板板降疾威嶽瀆蘊瘡疖金革蝕元化動植失其理乃

睠授大命 真人東方起一戎消欃槍四征翦封豕端
晨坐明堂來庭仰恭已

其三

維 皇凜邦本盱食懷春冰云胡堯湯運水旱妨年登
牲玉徧羣祀墜典靡不興覩土咨陽官 朕命汝克承
司事以時戒農祥晨可徵

其四

中春吉維望祀事歲且虔除壇簡農用瞽告協風先淳
濯致精意祇祓德逾蠲閭闔徹宵漏庭燎光燭天鸞旂

聲噦噦戾止於壇前

其五

維時夜向晨卿雲爛初霽外墮駐珩燾帳殿留玉軌箕
虞備和聲羽旄敝儻綴裸鬯手殷薦馨香神所濟盼嚮
煙燼中遙見揖羣帝

其六

倬彼田千畝后稷監所薊震渝爰有待陽瘴蒸土膏蔥
耨旣閑則覃耜乃躬操一墾示無耦三推肯云勞畢事
聖顏豫日華浮赭袍

其七

公卿何濟蹕方剛間黃髮班三循乃職恪恭孰敢忽終
畝維庶人備墾力搢搢係介播及時百種覆新垆億秭
鍾神倉我粢潔以醇

其八

式禮敬終事 帝用釐爾成來賀四方至齋宮血嚴清
田峻率厥屬襍穊雜簪纓膳夫羞玉食班嘗羅廣庭誰
謂田野人亦解簫韶聲

其九

天意如有含醲和變春寒激旭風不運重輪耀雲端一時轉僊仗萬姓瞻迴鑾侍臣騎如水劍佩鳴珊珊千載曠斯遇帝力歌同歡

其十

無逸唯聖謨太康古所戒居高聽則卑部屋僣時邁華陽馬欲歸渤海刀須賣菽粟如水火方隅饑始瘥更有監門圖愚臣贊颺拜

月下弄簫

雲盡秋空高素月停規影廣除如積水浸人肌骨冷紫簫閒數弄其聲澹而永驚鴻鳴相和白露霑衣領吹出太古曲舉世無人省余意在滄浪安得汎舴艋

有事太學宿御書樓下感述

索處忘歲陰境異結遐想竭來人跡外寂歷得心賞入門肅高矚形神迭幽爽循覽多陳蹟太息淡一往老槐四五株天風墜秋響隕陽漏東壁宿蘚連階磔須臾晚色來城闕黯蒼茫衆籟雜然作客意悽愀惘緬思昔建國規模何宏廣四維密以張教化尤敦獎成均作人府經史資溉養鏤板布四方庋寘危樓上治平有根據邪

說莫能蕩磐石數百年厥報實默享遺構猶幸存經始
憶疇曩丹雘剝高甍巖嶭欹銀榜斷垣失障蔽空庭塞
榛莽細民溷清閼樵鑄無人掌藜火銷太乙夜氣窺魍
魎羽陵簡易蝨汲冢逸難網牆壁隱詩書章甫淪兵仗
卽今絃誦徒不費公家帑採時見迂闊懷古足俛仰片
月寒近人夢遊尙惚恍

魏石生有選詩之舉賦贈

此道久淪亾風雅危如綫持論乏平心茹吐遂交戰循
牆固可非吹鑿未云善中立事調停復爲五色眩在昔

七子儔才具各雄擅聲華壯疲茶意匠開精鍊後起竊
形似畫肉狗雕絢廣睂非作俑半額累婉孌竟陵承其
敝矯偏亦有見居然拔趙幟風會隨犇轉譬之於山水
巖洞與陂淀幽奇足供賞河嶽一朝賤其流成細響字
句徒割剗瑣瑣及閨險蟲魚雜蕭散大雅詎得然二君
不受譴當今多人豪眼中數難徧孺子罵曹劉優孟爭
壇墀靈蛇家自珍四方馳軸卷隳喑牛耳歸抵掌雌黃
煽毫素寓藩籬索價同估衒魏子有憂之曰斯責余媼
折衷砭沈痼力虎目光電淡心避其名孤高寄搜選有

如弊羣吏良窳待最殿凡例粲刑章繩尺黜異揆標新
尊性情揆古嚴正變要領在無我剛大絕愛戀坐令元
聲復手抉淫哇腎強者不敢忌弱者不敢羨豈惟娛耳
目隆污相後先疑信世人情余言以爲弁

初度感述七章

少丁多難壯而無聞閱世未

淡復出窺語將以供不知我者詬病焉

燭龍無夢時夸父徒高步誰熾洪爐薪炊此花上露我
生閱茲辰屈指三十度齒髮雖未衰精力漸非故用世
與學道差池成兩誤妄意希古人知非已遲暮

其二

我母生我時未晬病不起祐薄禍乃雙七歲成孤子旁
復無兄弟食貧祇寡姊二十餘年來臨餐不知旨不謂
有今日兩間偷眎履所媿析薪遺獨抱餅鼻恥力短苦
道長沉憂莫能豸

其三

我里高河東

高河古水邑在
其北以此得名

實維顓帝墟邨氓數百家

俗類古陳朱承平孳姓族鷄犬恒晏如萑蒲一朝起殺
聲聞矜鋤茅茨照烽燧平原血成渠孤嫠走四方貫魂

刀俎餘羸老什存一轉徙無安居况復頻水旱新田無人畚盛衰有王者私念徒區區

其四

貴賤共茲日時改年亦侵一爲居養移悲歡遂異心吾觀貴人門車馬何駸駸磬折便娟子稱觴介千金下箸匱海陸俳優進奇音長夜不知亂茗芋酒重斟但恨天易曉絲竹聲銷沉

其五

亦勿歎積薪亦勿羨累棊薪居上先然棊增高愈危壯士傲白刃慊夫迫朝饑貧賤俗所恥富貴禍所縻貧不貧之間終老復奚辭

其六

天畀有定分黠鬼瞰高明拙哉王父偃鼎食換鼎烹大患吾有身百年煎七情有涯隨無涯此願何時盈所以高蹈士空谷葆幽貞世人不解意浪謂學長生拮据事爐火丹砂卒無成

其七

荏苒歲忽陽凝陰氣已冽同雲埋朝暾北風舞初雪集

霰霑庭柯寒響何騷屑斗室幸未冰含毫效一映緼袍
足禦冬蒙茸望敢缺造物力深厚貞元用更迭安知嚴
殺際生意中蘊閉吾道不終否爲齒勿爲舌

送王念石之符離

君歸自衡嶽應上岫嶺峰爲尋禹碑字茫茫野雲封揚
帆返京國轉蓬等行踪金閨舊夢渺丹轂新恩濃遇合
非所艱天闕足知己君豈簿書才相屈偶然耳符離控
楚宋其地古戰場分猷綏一路玉節何焜煌與君同學
時豪氣人辟易謔浪橫古今子立壁千尺昨來共君語
意興不如昔將無聚散情賢者亦未釋君行當嚴冬燕
郊草枯白握手欲無言風吹馬毛磔政成早歸來宣室
待前席

心遠堂詩集卷之二

高陽李 蔚臺書著

遂安毛際可會侯訂

鍾山王才鼎調臣叅

男 李其凝孟績 輯

李其恕仲如

五言古二

積雨彌旬索居多暇卽景述情成詩七章 丙申

夏閏暑氣微積雨况未歇蕭然庭戶幽曾弗異林樾雜

花遶堦生次第清香發尙友北窻人羲皇此津筏

其二

竊祿聊代耕性復畏煩劇珥筆幸多閒素餐免譙責玉
堂集時髦自愧他山石奇字困應酬談經昧幽蹟冒雨
且歸來下帷有餘適

時余方教習庶常

其三

薄劣寡交遊塊處耽閉戶晴明無客來况復阻陰雨青
含砌竹肥紅濕盆榴吐蝸跡篆虛窻苔痕繡閒廡靜觀
欲忘言物理斯可觀

其四

世味無所解結嗜唯簡編寂寞以終日開卷卽欣然古
人不我欺操縵方安絃欲求作者意力弱愁攻堅往復
難自釋拋書成高眠勿令學徒知恐嘲邊孝先

其五

夢覺檐響靜晨光乍熹微青天漸解駮沉雲亦歸飛所
職在鉛槧期會不可違歸途望西山晴翠侵人衣巖穴
知匪遠溪漸矯語非

其六

片月出東南雨後光愈皎微雲似相避素影翔天表大
火漸欲中湛湛銀河渺鳴蛙喧草根流螢墮樹杪宴坐
遂夜淡息心謝膠擾安閒稱疎愚所得已不少

其七

陽烏三日輝豁爾沈憂釋密雲自何來飛雨忽當夕淙
淙竟達旦聲若萬弩射茅屋頗穿漏欲睡不安席四壁
盡揩在踟蹰畏崩坼曉起看空庭浸堦水三尺吾廬不
足憂但恐失禾麥惕厲天語勤蔬食虔牲璧有司無告
勞仁愛自昭格

九日

代謝有常候荏苒迫歲陰靜者觀物化勞人苦時侵重
九各可愛令節傳古今奈何牽世網馳驚違寸心驅車
歷長陌濃霧翳高岑飛沙送驚飈商吹鳴空林歸來掃
塵榻落葉盈堦淡藜菊如自媚繁花散黃金貞脆固殊
性澹焉同幽襟分無白衣至濁酒聊獨斟

南苑扈從雜詩

五首
丁酉

南苑三扈 蹕西宮再逢夏茲來新雨餘物色澹清灑
朱火伏未盈雲峰鬱堪寫萬幕繞宮牆櫺比如里社朋

儔各相呼過從歡非寡
斲此釋煩襟有獲欣謀野

余以乙未

正月初至南苑扈從丙申五月再至及今而三

其二

散步乘晚涼西眺見羣峰
返照射雲隙滉漾紫翠重
雨洗原野淨草木爭丰茸
往往牧馬還時與歸禽逢
喧寂一異境曠翳遂殊胸
乃知造物奇特爲勞人供

晚步

其三

新蟬何處聞苑彼周垣柳
朱明綠暗時雨歇風輕後
悠揚驚客枕斷續穿宮牖
簪筆幸餘閒天籟聆非偶
崢嶸

日月逝俛仰初心負樹蔭
一編書臥聽憶南畝

聞蟬

其四

去年西苑舟今年南苑雨
宸遊殊動靜扈從仍重五
無因酬令節霑霖坐相苦
几席費隄防帷帟煩撐拄
濕雲低近人行潦深窺戶
晤言賴友生未覺蒲觴寡
半醉獨篝燈天外聞簫鼓

五日同予袁苦雨

其五

野處當盛夏苦雨固其恒
驚飈胡爲來中夜肆馮陵
震電怒不息雨雹紛相乘
衆竅助呼號二儀疑隕崩
吾廬

力不支勢欲隨漂騰捍禦雜僮僕昏仆疲股肱有如一
葉舟颶母中流興又如萬鐵騎摩戛鳴戈矜微軀委大
化屏息良不勝逾時乃衰止安全豈人能擁衾坐申旦
不覩朝日升復聞 翠華出新雨閱田塍

夜大風雨

題曾霽雲先生遺像

癸丑同館閣公先子所嚴長離起閩嶠振羽光炎炎三
禮帝咨伯醇風再被漸用之乃不盡慳公以梅鹽閱載
四十奇覩公於斯縑典刑森須麋精英浮紳衽不殊從
公遊負劍承視瞻墳笮緬隔代霜露涕重沾圭璋欽喆

嗣世業傳縹籤拜手囑珍弄麟圖竝無燿

南苑卽事用韻

戊戌

歲晏庶務和 豫遊動仙蹕從邁有常期待臣咸橐筆
行宮丹雘新環衛周廬密老樹振凝霜遙山澹寒日鏡
吹時復聞千騎霓旌出蒐田寓詰戎馳驅契無逸封事
幸餘閒素餐責易畢高言許追陪蹇劣濫清秩步武得
儀刑馨欵依殼率矢爲麻中蓬薰陶變微質

時菊潭逋齋諸先生

偕行

贈外舅朱公

伯陽觀妙徼園吏遊逍遙副墨幾千年解人乃寥寥夔
蛇謬相憐鶉鷄終自超外身捐物絃見者使意消達生
偉我翁脫屣追松喬鞭後真有得帶適久忘腰曾見海
底塵不覆隍中蕉翔鷄摩雲漢鼠璞豈爲邀願翁堅此
意坐待神山招歌嘏且勿厭春酒浮詩瓢

賦得元日到人日

巳亥

夢牖警高青溫瞰破凝霧晏起振敝裘始覺得春趣回
思六日來窮陰騁嚴沍曦輪祀無跡物色慘昏菴歲朝
驚鬱攸震灼西鄰屬吾廬幸安全椒盤委狼顧

元日鄰家遺火

余居僅免濃霧繼昕夕木介三四度如霰復疑霜芒萁紛布
濩兩爲南苑行馬蹄踐積素列幕迷炊煙長阡森玉樹
歸來檢占書頗爲首種懼二氣或僭差無乃煩呼籲何
期天心轉茲辰賜和煦佳坐有餘閒剝啄不及戶市塵
人語嘈漸理嬉遊具一懶謝流年人生且隨遇

穀日卽事

巳喜人日晴八穀復陰晦北闕匿晨熹西山失遙騰輕
飈痒肌骨短簷垂霑霽春服未可裁年華罷雕績入夜
雪微作六出競姿態稍看凝階除皓潔媚盼睐吹萬靜

寒宵遠柝傳闐闐或謂兆有年三白仍需再但使歲功
成敢惜燈遊礙襪祥余何知手學聊相對

曉霧下直用韻

朝霧增春寒曦輪不得騁冰花結須眉長衢迷素影羣
動各有營車馬喧塵境襪被早歸來齋心慚內省徒羨
考槃人幽居遂恬靜

送葉玉倫令容縣

葉子吳士雋醇質抱美才三仕仍墨綬世路何遑迴通
籍令燕南登眺天風臺浮雲雖善蔽旋覩陽光開秦關

再捧檄巖邑邵水隈政成未及報讀禮復歸來麾手謝
榮膺食貧忘怨咲重念學古力未甘壯心灰茲行得容
江遠隔西南垓蒼梧控百粵聞見多奇佻風氣異中土
夏瘴兼冬雷五嶺困輿馬高灘苦公涸遊蠱光燄毒站
鳶毛羽摧蠻獠鳥獸性難以禮義裁况當兵火後閩井
鞠草萊伏莽猶未靖殊俗蓄驚猜子荷芻牧任教養職
所該幸無鄙其民治術奮規恢化導宣德意噢咻勤招
徠務俾安耕鑿無令陷罟罟漸被以文物絃歌雜笙箴
遐徼快一變挺拔見吏材公論在婦孺何用愁無媒把

袂贈言罷春風吹離杯行矣勿戚戚丈夫豈徒哉

閒居雜興 九首

茅宇新結搆荒徑時埽除非園亦非墅聊稱幽人居繞
階羅卉木滿架陳圖書雖異巖穴趣自適頗有餘平生
無密友非緣索處疎

其二

當關無剝啄幽興催早起科頭閱動植小庭閒步履秋
淡氣轉和風日快晴美晨光漏林樾鳴禽聲入耳倦行
臨砌坐把卷清陰裏反覆古人言會心時啓齒行休念

吾生所得已云侈

其三

時序近重九所喜連日晴心閒四肢逸偃曝就南榮顧
見籬下菊鞞鞞黃金英孤妍不悅衆晚收移我情寄謝
成蹊者無訝異生平

其四

喜晴方未已驚飈忽繼之寥寥衡宇靜撼撼高樹吹黃
花舞顛倒落葉鳴聲悲太息人事異不定如天時物我
委大運安用分榮衰

其五

翩翩簷際雀啁啾似相語茅茨朝日溫歡然命儔侶但
能遠羅弋不願豐禾黍微物智於人一生需幾許

其六

遲遲蓬門啓冉冉寒日上清霜漬庭蕪冰漸結魚釜吾
觀代謝理流形遞衰王二氣以默移妍醜遂殊狀金石
延微軀所希無乃矣

其七

落木延暝色雲盡天宇澄庭際如積水素月和霜凝箕

斗自高懸實用誰見微嗒焉壯心折商歌徒撫膺

其八

達人感世短烈士悲時邁我獨頑以鄙此中無芥蒂羊
祜難親疎徐邈渾通介古人獲我心執鞭以爲快世味
如鼎鬻染指當一噉防噎在屬厭老饕有明誠

其九

自余罷朝謁奄忽逾十旬心已逃空虛跡尙異隱淪畏
客原僻性况復寡交親蹉然不及戶偃仰恣天真百年
諒有以萬慮倏已陳息黥補吾劓敢負造物仁

扈獵發南苑

巳亥仲冬

講事耀皇威時巡首畿甸選徒盡貔虎從邁合纓弁
 維時日長至雲物美清晏上林啓西墉仙仗移行殿六
 飛御弧矢七萃嚴組練招搖旌曳霓騰達騎流電鏡鼓
 士氣作鵝鸛軍容變林莽而周陸岡原快登踐夏服爭
 一發湯網祝三面黃耳振重鈎蒼翮脫鞞纏兔犇窟穴
 迷雉隕毛血濺旋抽勇堪鼓超忽目易眩如陵獲競多
 命處技各擅大庖無取盈乾豆詎勝薦側窺廟謨遠
 因事慎規填馳驅示無逸惕厲在忘戰肅殺順時令休
 助咨寓縣不然好生德從禽寧所戀儒生履戎行盛事
 但驚羨愧無穿札力跼蹙傍鞅鞶

附集選送子明歸金陵四首

蓐收清西陸

郭景純

秋風發微涼

曹子建

庭草萎以綠

張景陽

白露爲朝霜

左太冲

紆鬱遊子情

陸士衡

願言旋舊鄉

潘安仁

徘徊不能去

王仲宣

攜手上河梁

李少卿

何以敘離思

潘安仁

興言在臨觴

陸士龍

臨觴歡不足

陸士衡

相去悠且長

蘇子卿

其二

流波戀舊浦

張景陽

客鳥思故林

王正長

離合非有常

陸士衡

悼別豈獨今同上 所思在遠道古詩 曠望極高深謝朓

久要不可忘曹子建 布懷存所欽謝宣遠 晤言用自寫阮嗣宗

丘中有鳴琴左太冲

其三

金陵帝王州謝朓 故國多喬木顏延年 出宿薄京畿謝靈運

稅駕從所欲陸士衡 綢繆踰歲年江文通 怒焉傷別促陸士衡

良儔不獲諧盧子諒 徒作千里曲謝靈運 在遠分日親曹子建

寸心於此足沈休文 仰視浮雲翔蘇子卿 天高萬物肅張景陽

其四

悠悠涉長道古詩 迢迢匿音徽陸士衡 川陸殊途軌同上

引領遙相睇古詩 涼風厲秋節王仲宣 淒淒陽卉腓謝靈運

停艫望極浦江文通 林表吳岫微謝朓 養真衡茅下陶淵明

樂道以忘饑傅長虞 努力崇明德李少卿 桑梓有餘暉王仲宣

匪親孰為寄丘希範 知音世所希陸士龍 願為雙黃鵠蘇子卿

奮翅起高飛古詩

贈陳若水兼送之建南壬寅

北風吹枯莽霜花照征袍相送不能別慷慨捫珩刀論
交二十年如彼水乳遭蘭雪映肝肺明義層雲高重逢

益靜穆晤語解天張揚挖盡今古鷄壇振風騷浮白佐
吳歛朱絃賞雅操申且不知疲金釭竭焚膏所志存古
歡匪徒文酒豪良會未云足俄看理旌旄將離欲爲贈
使我心鬱陶羨君抱大器經營四方勞有時薦清廟鈞
天奏雲璈建南予所歷溪山美遊遨况今鯨鯢伏環海
靖波濤政成早歸來爲君儲清醪

成文穆公素園圖爲青壇少傅題

癸卯

淳澆日更迭慨焉慕往古前哲不可作遺跡亦欣覩偉
矣文穆公相業炳冊府抽簪燭幾先綠野開林莽結構

倚天然亭臺屏妍斌天喬各適性禽魚歡得至公日遊
其中煙霞恣攜取老友定有人飛觴復揮塵卽今三紀
餘高蹤歷堪譜少傅起興朝尹陟看接武創垂邇手
澤不朽託毫楮茲圖得其槩披玩神軒舞緬惟先君子
中年謝圭組菟裘營未成騎箕銀漢滄傲虛數椽在不
足蔽風雨淡余堂構慚撫卷中心懽

癸卯除夕偶讀東坡集有龍鍾三十九勞生已強
半之句余年適與之符因次其韻成長句一章
感舊述懷見乎詞矣

擾擾百年中苦樂適相半墮地逐塵緣一往成慨歎世
事如雲煙過眼難久玩仕宦有升沈親友多聚散嗟余
三十九孤生無與伴閱歷盡陳迹逆數等宵旦弱冠竊
升斗珥筆侍香案匡時愧籌策鏡古迷治亂年來益疎
慵思以道自盥頰短汲苦涸流光不肯緩四十倏相侵
無聞仍舊貫未知伯玉非其守之奇悞今夕復何夕火
映松盆炭躍躍兒女懷點綴喧庭館明日把屠蘇後飲
須重暖濡毫和遺編清言慚綺粲

元旦次日大雪復次除夕韻

甲辰

歲朝雲物和微風興夜半閭巷鷄犬寧比屋無吝歎侵
晨訝寒威曉色未許玩同雲羃庭宇天鵲滿空散初疑
柳絮輕似作梅花伴霏霏過亭午冽冽如清旦孤吟乏
同賞空樽臥塵案亦免剝啄來踐踏璫瑤亂節假追朝
謁晏起徐櫛盥安坐調素琴心閒手恒緩倚絃歌白雪
歷落驪珠貫謝彼豪華子飛觴論猛愞錦幄炙笙簧金
爐然獸炭慚予享清供蕭寂幽人館行看大有年耒耜
需春暖南畝掃遺蝗家家歡授粢

題劉孝子割股卷

新安人名子信母病割股以進
遂愈詳見高似斗司寇敘

忠有虹貫日勇有石飲羽至孝格神明霜刃試無苦膚
剝心則愉父悲母已瘡色笑等尋常沾沾恥揚詡大哉
百行先頹風挽淳古吾知渥城傍畏壘巍然覩

雜述

乙巳

自夏徂秋退食多暇觸懷成句得詩廿二首語
無詮次故以雜命焉

三春苦怕風驕陽夏復半祝融秉炎火大地歸爐鍛赤
鳥翔中天永日不肯肝沙礫迷街衢蠅蝻擾几案纖絺
劇重鎧坐起漿成汗襪穢時見呵剝啄幸已斷西北無

麥禾東南滯白粲素餐何以解疾首誦雲漢

其二

向夕雲色好油然欲爲霖飄風從西來席捲歸遙岑碧
天淨如掃餘涼爽衣襟苦熱何足言所憂在歲侵吾欲
愬風伯天門高且深

其三

入夜不能寐羽扇無停揮仰眎天宇闊象緯何離離鶉
火位方中河漢將西移念彼代謝理吾生豈無涯嚶嚶
飛蟲鳴熠熠流螢輝物我隨大化堅脆諒同歸

其四

道逢祈雨者徒侶何皇皇金鼓震通衢旌旛競飄颺土
木象神龍鱗甲飾丹黃父老爭奔馳婦孺亦趨蹌小人
雖身謀憂勤助巖廊有司委釋老結壇薦馨香精誠苟
可達寧在盛儀章我聞大雩禮歲舉有典常春秋書非
時憂民貴豫防爲犧抑已甚遐哉古成湯

其五

朝來暑氣添時令入初伏有滄妻以興俄看飄颻霖未
能被壟畝差可解炎溽中夜乃滂沱膏澤漸霑足喜極

不成眠起坐聽簷瀑竚見焦暵蘇同人歌鼓腹

其六

冉冉畏景暮皎皎素魄盈炎靄散林表清輝滿前庭何
以陶永夕開軒命友生圍碁觀坐隱朱絃發希聲鮭菜
隨意陳壺觴聊共傾或述田野樂或言山水情笑語見
天趣無復俗念縈何如市朝客噲沓談利名

其七

圃中有隙地可以營茅齋匪日事遊佚聊用寄野懷因
凹以爲池就凸以爲堦棟宇取樸陋簡易省安排緣畝

被瓜瓠傍簷蔭榆槐有同蔣生徑期與求羊偕蘧廬豈
不悟委順無睽乖不見古至人嗒焉遺形骸

其八

雨後曉行園蔥蒨色如染霑濡土膏發可以施鋤菘夏
畦人力勻秋蔬種方掩早苗苗茸茸後坼甲點點迴風
舞天喬零露滋荏苒禦冬庶可期旨蓄計無歉歸田興
聊寄拔葵誠誠忝何當偕老農長往事耕斂

其九

今朝已秋令涼雲送殘暑微雨集庭柯綠葉隨風舉絺
綌漸不親齊紈意如旅却思歛蒸時將謂永淪胥寧知
大運更迴斡速如許世人胡昧茲炎炎欲久處

其十

翟公悟盈虛老氏垂止足陳力周任言婚嫁向平躅嗟
余本悞夫徇世營口腹吹竽倖濫售弱冠叨食祿侵尋
二十年生耳見車轂裨補乏毫毛鼎實羞公餽避賢有
前轍斯意亦久蓄况復雕朽材埤遺負鈞軸所恨機未
諧撫躬實維谷欲就良友謀引領待忠告

其十一

龍門有孤桐其音中宮商斲爲綠綺琴得升君子堂徽
以昆吾金軫以玉截肪絙以朱絲絃盛以縹錦囊援之
奏何曲廣陵與明光徒有古器存惜哉古調亾涓曠不
可作舉世沸絲簧

其十二

鳴蟬本微物胚胎自泥塗炎風假之便憑高任喧呼喋
喋如有訴纖羽颺輕軀使我夢魂擾不得遊華胥爾時
能幾何秋霜被庭梧繁聲會銷沈終作抱葉枯詩人刺
蜩螗宣父吟蟋蟀厭靜而尙囂無乃非良圖

其十三

何以寫我憂駕言出南郭窈窕誰家墅芳塘映林薄石
徑滾逶迤亭館布參錯芙蓉爛錦綺飛梁跨水閣規模
殊壯麗金碧已剝落賴有遊人來時時慰蕭索借問勗
者誰當年氣熏灼傳舍閱多人百歲如今昨感此意豁
然萬事付杯酌爲語同遊客慎勿緩行樂

其十四

秋暑鬱未收淫霖助烝濕昨晴今復陰已聽簷溜集苦
早憂方終苦潦行復及嗟爾田疇人八口何由給

其十五

吾聞有漏天南恒北方少茲雨胡纏絲一注連昏曉沈
沈雲影晦汨汨簷聲擾几席濺飛流堂坳漚池沼蝸牛
上衣析菌耳生絳縹九衢漲昏墊跬步陷泥潦疑決天
潢傾翻愁砥柱倒春夏苦曠乾入秋嗟浩漭陰陽一乖
蹇萬物困濕燥感名誰能明仰首視蒼昊

其十六

月彩瑩如珪露華涼似水披霧睹青天萬象皆欣喜獨
有無絃翁片念何曾起

其十七

在昔有至人號爲列仙儒陰陽稟間氣變化超寰區首
能絕嗜欲自甘山澤癯精華盜天地偷生尙多虞奈何
末俗士妄念起貪愚志耽世味醲矯語慕沖虛軒冕成
內熱粉黛攻殘軀無聊自解免浪冀延斯須况彼方技
士其言誕且迂娥媼以爲鼎鉛汞以爲爐熊經與鳥伸
百病可蠲除以彼誨淫說中此多欲徒沒世竟不悟誰
能鑒前車

其十八

曲士自爲廉醜女自爲貞隻手掩衆目盜取後世名東
陵悲死利西山笑遺榮室怒而市色方寸淡府城去去
非吾徒相逢蓋莫傾

其十九

積雨再經旬蒸生苦淋翳何期今日晴復覩三光麗秋
山翠峩嶷秋水澹溶潏高淡故依然陽晶散陰沴浮雲
擅天威乃與飄風逝寄語杞憂人淫霖有時霽

其二十

彼美荆山璞玉人琢爲餅淳質謝華飾虛中示持盈流

傳彌歲年頗遭世眼輕故人持贈我意重十五城古色
照心顏比德欽幽貞願言薦清讌庶以表君誠

其二十一

有客升我堂衣裝浣泥滓未語先蹙頰太息不能止爲
言今年災畿輔縣千里吾鄉尤顛連先旱後苦水三春
滴雨無高田麥枯死污邪雖半獲所得皆稔秕不足完
官租矧能沾箸七六月雨稍濡晚禾頗蕤蕤引領望有
秋俯仰命相倚七月雨大作禾頭盡生耳經旬猶未休
廬舍俱傾圯平原漲洪流高下迷涯涘人思樹杪棲舟

向城門艤粒米與寸莖無以活婦子及茲不存恤將恐
成轉徙求食或走險草澤憂方始余聞初驚嗟迴思類
有泚竊祿曠天工其咎將焉委長揖謝客言何以助爲
理客去雨復來黑雲低有咫

其二十二

和陶

躬耕力不任未敢談雲山坐此滯榮祿局踣逾壯年雖
無羨魚意結網已臨淵故業日蕪廢荆杞生良田一身
如旅人趨走塵土間今晨涼風至黃葉墜我前寒螿響
高林歸鴻掠秋煙物換逐馳景催人成華顛微軀匪金
石胡不謀自閒覽甕事浮名爲問誰使然

除夕二首

除夕倘無詩一年亦虛度凍研與枯毫天成卒歲具兩
曜無停輝浮生樂馳騫知非忽已晚朱顏易成素四十
復增二百年真旦暮惕然念行休老訓在止足

其二

今年多暇日遊咏諧夙耽檢點舊詩草去歲僅十三生
平得如此貧老亦復甘况乎竊祿秩世味久已諳於物
旣無裨虛名諒難堪坐嘯送殘景居諸祇懷慚

題管節婦曹氏卷

新安人高似斗司寇爲傳
丙午

古井不生瀾貞木不萎霜齊一結大義肩荷在倫常中
道罹乖割之死矢同行顧茲仰俯累抑志稱未亾恤緯
戒甘旨晝菽授詞章青燈幾十載冰肝映藁腸二老各
得所雙雛待飛翔持此謝良人含笑歸泉鄉淳風表畿
輔淑質鍾琳琅大家遺女訓苗裔傳芬芳爲善未食報
論者無心傷吾聞崔山南易世門逾昌

題彭哲人乃祖名宦卷

溧陽人前白水令
有政

彭子何方來衣帶秦川土一卷出囊中津津爲乃祖記

之者吾師其言何覲縷乃知南洲公循良升豆俎白水
古彭衙厥地隸三輔馮翊屏西京拱衛稱左股彭公作
令時吏治猶近古惻惻號宐人耕鑿田疇伍吠犬足生
菴千村夜開戶卽今百年餘來暮歌如睹畏壘得庚桑
尸祝專祠宇伏臘潔明禋絃歌雜鐘鼓四世有聞孫過
庭思政譜間關數千程先型尋舊部父老歡然迎謂我
昔明府崇祀與豐碑遺愛歷可數道故若家人倒屣徧
環堵揮涕眺山川感慨生仰俯吾觀昔循吏龔黃及卓
魯或生享榮名或沒延世祐天心晰報施往復如張附

古人勉爲善責效羞市賈彭子凌雲質一時嗟鍛羽小
屈會大伸蓬累何足憮公侯世必復達人克繩武三代
直道存書此勸乳虎

彭子哲人客京師逾二年所蓋數見之而未及深談
也頃過余蔬圃語小洽出斯幘索題乃知哲人久客
不歸繫此之故南洲公政蹟與其邑人甘棠之愛汾
陽先生言之已詳余無庸贅述不揣輒成韻語一章
紀事以塞哲人之請他日復過汾水其以質之先生
當必有以正其紕類也

哲人名士俊
戊戌進士

題顧文學小像

水部見山君祖華亭人
丁未

先生起東南扶輿萃清淑沈酣六籍中韋布懷珠玉臯
比正師席春容資誦讀經術蔚彬彬匠門無曲木著書
惠來學名山藏簡牘白駒不可招還心在空谷異代識
聞孫家學紹徽躅毫素見儀刑拜手衣冠肅

送法黃石之江南

霜風吹河梁枯柳折難舉別筇凝寒醪含意咽無語委
形逐塵囿聚散等羈旅君去領名藩坐聽歌衣褚揀時
急卑之微言偶收圉黃虞道稀闕稷禹固所許旣以謝

蒼生亦以荅古處

雜詩 十首
戊申

五月旱太甚融風氣如焚北陸淹畏景極目無纖雲一
陰將戒候化機失細縵友紀未敢逸莫瘞亦已勤三復
雲漢詩先正胡不聞

其二

其雨乃恒風虛占亦云數今宵始成霖平明已霑渥大
塊蘇羣生歆烝散如濯枯苑翻覆間天澤豈潦邈誰云
感名遲和氣園扉覺 是年因旱錄
囚六月大雨

其三

喜雨方未已愁霖復繼之二氣偶乖蹇翁闢俱非宐人
情本無厭天意良因茲哀此下土愚徒然生怨咨造命
有恒理譙讓復奚辭

其四

朝看雨及暮夜聽雨達晨晨暮不復辨將爲風波民忽
忽牛女夕昏墊欲盈旬烏鵲濕不翔黃姑隔天津何當
叩靈匹一爲籲高旻

其五

大水冒城郭前史不恒書何爲治平世黔首愁爲魚復
聞齊魯間異變驚堪輿水土失其職昭戒良匪虛策免
有已事撫躬媿焉如

其六

娟娟月吐雲溥溥露凝砌今夕復何夕再覩天光麗回
思淫潦時將謂傾大地彼蒼實好生怒渝不終遂誰能
炳幾先恒爲未雨計

其七

晨風西北至商吹生林臯旭日斂朝霞始覺天宇高策

杖步壟畝新涼入輕袍念彼田家計力作終歲勞藿食
更多憂何心析秋毫

其八

鑿池貯清泚種彼蒲與荷雨露所滋息受氣無隆窳亭
亭出翠葆灼灼揚紅葩采之將誰貽伊人隔蒹葭芳妍
固爲好歲晚當奈何

其九

神龍行天上變化無端倪首尾不可見潛躍理無睽胡
爲遊潢潦出沒如鯁鯢平陸劃洪河萬姓困塗泥伐木

近燕說鱗孽庶可稽

是歲河南山左皆報龍鬪俗傳龍伐木

其十

兩儀雖定位升降憑氣機陰陽所鼓盪水立山能飛
同時數千里黔雷播天威厄會古有然聖賢莫能違
世無劉子政誰能察其微

送李召林假歸桂林

巳酉

桂嶺高嵯峨桂水清揚波其間所鍾者磊落而英多
揆藻翔天庭鳳羽歸絃羅青蒲聞讜言仁風扇巖阿
高者增其厚清者釀其和睠焉懷松楸此離傷如何
蕭條朔

氣寒驄馬鳴玉珂贈處希古義用陳勞者歌

南苑雜詩

七首
庚戌

不踐城南途歛焉已十載豈惟日月積似覺阡陌改
荒畦接村墟居人幾家在久旱麥禾焦耕者方憂餒
長風吹驚沙羸馬循殘壘繚垣啓紅門紺宇奉真宰
曾識經始年金碧餘光彩石梁隔流水濺濺濕蘭茝
徒御遠相失行行意彌怠筋力非當年馳驅增歎慨

其二

憶昔順治中頻隨翠華至組練閱七校羆虎擁千騎

菟苗順時令縹緗勤講肄非徒武備脩兼亦崇文事紛
紛玉堂賓接跡交戟侍夕火聯廬幕朝霜共鞭轡而余
厠羣彥幸免周旋墜麗澤資儀刑珥筆依行次俄驚鼎
湖變遂灑蒼梧淚 恩淡百未酬號弓徒捨地迄今十
年來有覩猶在位重來覩陳跡風景河山異青雲皆新
交故人盡凋瘁欲與話當年往事誰省記惟有宮牆樹
顏色轉蒼翠

其三

蕤賓將應律畏景長如年遽廬僅容膝心閒形晏然晤
言苦無人聊與古周旋把卷欣有得沈思冥言詮禺中
炎歊盛赫日俄當天揮汗欲成漿安能親簡編徒倚無
所事拋書仍高眠誰爲馬相如雕輦進新篇

其四

永日幸已暮飄風亦時休夜明始生魄團團東南陬浮
煙散赤霞炎氛夕方收河漢不可見大火當天流須臾
涼颼來侵肌凜如秋在野無籓籬寒燠憑所投攬衣望
四荒天宇曠難周箕畢自殊好衆願何以酬驕陽亢微
陰不雨豈無由坐淡直廬靜清漏聞悠悠

其五

融風吹南陸獵獵帷帳鳴披沙一開眼油然見雲行沈
沈黯西山遙遙接高城濃陰蔽朝旭曉起聞雨聲茲聲
一何美能使珠玉輕甘澤雖未足亦可濡枯莖播種盡
人事種種均西成凡草固易滋蒼然乘怒生晚霽看野
色一洗塵襟清素餐愧宵旰舍郊厓省耕

其六

章甫適於越逢人笑其迂赴赴魏豨場何事來腐儒角
技無所長日挾一冊書吟哦送晝景坐起時卷舒兒童
顧之笑無乃非吾徒舍此徇俗好結習良未除亦知從
禽樂卽鹿懼無虞

其七

西北有崇丘策馬陟其巔長風送白日振衣何翩翩突
兀夏雲起仰見羣峰連曠焉豁心目萬象森我前茲地
盡靈囿芻蕘隸中涓週牆接郊墟禾黍被長阡時雨未
肯濡首種付石田回矚瞻宸居雉堞紛祥煙鬱蔥氣
佳哉端拱思厦旃晏安胡可懷習勤古有然載馳以忘
暑興盡乃言旋

晴眺

登赤城北山岡同右之
壬子

邊風和煦少邊日
晴明稀春氣今始萌
高岡聊振衣徘徊
古祠下長松鬱依依
羣峰供遠目俯仰娛
清暉瀾瀾大河流
翩翩塞鴈飛喧寂自
塵境悠然獨忘機
所慚滯簪組久與雲
泉違何時謝物役禽
尚終同歸

纂修

世祖章皇帝實錄告成蒙

恩進秩

頒賜銀幣鞍馬

錫宴禮部恭紀四十韻

壬子

閏七月

天子攬乾綱康熙紀年六政教布維新典章肇興復端
拱居法宮深思紹先躅前席召台司咨詢收啓沃
日維我

世祖混一開歷服功德邁虞周仁恩洽草木大業何焜
煌遺徽在耳目垂範詔來茲流傳資實錄纂述惟乃
職精勤各宜勗諸臣拜稽首祇奉綸音肅任大懼
難勝敢不勉樸檄臨軒降璽書錫宴良期卜乃附
禁城墉擇地開史局乃集玉堂彥分曹辟官屬乃發
金匱藏兼采諸司牘義例嚴體裁董率限程督大政

舉洪綱機宐詳委曲摛詞期雅馴紀載屏繁複大書
特書殊所見所聞足操觚朝接席焚膏夜比屋點竄
草頻易繕寫穎幾上聲禿以茲歷歲時首尾五寒燠編
摩始告成正副分卷軸三體備裝潢牙籤映瑤櫝維
時歲壬子蕤賓曉清旭 法駕御正衙羽衛陳左纛
九賓咸在庭

天顏瞻粹穆 寶舉進琅函拜表效嵩祝禮成慰 宸
衷錫賚 恩膏沐綸閣晉宮階詞曹增秩祿 尙方
放鏐綺天閑出騏驎鐘鼓饗容臺便蕃禮文縟念臣

章句儒雕朽徇時俗釋褐事

先皇樗材荷亭毒密勿點黃扉隕越恒覆餗茲役實因
人承 恩慚碌碌洪惟我

世祖駿烈耀帛竹作述仰

聖明達孝羹墻篤昭揭同日星流峙同嶽瀆燕詒永無
窮千秋欽寶籙

贈孫北海前少宰

老成國元氣悠久占時雍淳龐秉幾先出處皆從容退
谷退何早結茆西山峰斂彼黼黻手盪茲煙雲胷解組

二十年選絕塵埃蹤不食洵碩果後凋維寒松兒童逐
堯夫里巷觀李邕巋然魯靈光剌施識所宗嗜學晚逾
篤丹鉛無時慵六經賴解駁百氏息唵喁蟲魚羞瑣屑
輦悅黜織穠羣蒙豁然啓輪墨歸銷鎔大業藏名山絕
學振膠靡卽今登大耋德邵行彌恭時於物我外千秋
寄遐悰贈言愧雕鏤聊以效秋蛩

贈芮茂才

工鐫章

天地有大文垂範在金石不覩古人心猶傳古人跡跡
傳心亦傳神契無今昔蒼萃河洛精寓此徑寸璧心手

自相忘至樂非點畫從茲子雲亭吾爲問奇客

送子靜假歸

癸丑

亭亭南山松移植金閨裏雨露日滋榮歲寒恒自矢赤
霄孔翠翔腐鼠鷄雛恥那將盈眦福易此心如水稽古
力有徵匡時策方倚寧效鄉里兒上冢耀青紫凍柳折
寒條酸風吹馬耳相望燕南陲眼中人遠矣

秋日襍興四首

積雨掩晨光庭柯淒以碧微風西南來衆葉鳴策策旣
快煩暑收更念歲華迫天道惟一貞物情無兩適坎止

與流行時至誰能逆

其二

粲粲東籬花金英雜朱殷歲晏無人采離披霜露間昔
之賢達者高會登龍山俯仰感今古意氣卑人寰盛事
不可再太息摧心顏唯當理初服蓬蒿淡閉關

其三

芳蘭生當門見者理鋤具於蘭非有怨以彼妨行路樗
櫟大蔽牛不爲匠石顧拳曲終天年乃以不材故我貴
在知稀人生審所遇

其四

四序如轉轂寒暑歲功成勢極當代謝造物難久盈妍
媿無定質愛憎無怕情緣盡意自移巧力誰能爭邴仕
輒自免疏歸果遺榮避賢吾所希心跡何時并

西

